

Gui'ch barojp bacaa San Pedr

Rxhiaal Bëd xtiidx Dios loj ree bejn

¹ Naj, Simón Bëd, najn tijb xi apóstol Jesucrist rün tēen sirv lojman, cukan gui'ch guie par läjt guial rajpidi lasa'gajc guialrliladx za'cdxoon ni raya'pan, yan guial ma naya du luxdoo ree por ni been Jesucrist, Dios raliduladx ree, bén rabëë bejn ree loj dol. ² Gütünle' Dios läjt mazri, yabe'cdxe tēeman luxdoodi guial ma nünbeedi laaman nē dux Dad ree Jesucrist.

Zi'c rayal gac ree xbejn Jesucrist

³ Por xguialrniabee Dios ma baneeman gra ni rayaadx ree, din yaya'p ree guialnaban tiblayaa, yabajn tēe ree naya delant lojman, din ma naguieenbee ree Dios bén gule dunuj ree guial ca'man guialrniabee naj tēeman benza'c. ⁴ Zeel ma beenman promejs du loj ree, promejs naroob ree ni lasajc ree, abi' por laa reen ma yu' xSprijt Dios luxdoodi, ma been tēedi tiblad gra ree ni ad rüjnt sirv nē ree ni mal riga' loj guidxliuj guie. ⁵ Zeel gol been naguiejn por guialrliladx ni rajpidi gol gubajn zagdxe, din guial guibandi zagdxe, dxel mazri ma gagbeedi xhienaaag guibandi. ⁶ Abi' guial gagbeedi xhienaaag guibandi, ma zajc gucwëëz xix-gabmalidi, abi' guial gucwëëzidi xgabmal guin ree, ma zajc gapidi pasens, abi' guial gapidi pasens, ma zajc guibandi naya delant loj Dios, ⁷ dxel guial guibandi naya delant lojman, ma zajc guiën

lasa'di, abi' guial guiëñ lasa'di, ma zajc guiëndi gra
ree bejn.

⁸ Bal yu'guijquidi nine ree cusnuu tëë cayüjndi
naguiejn guibandi zian, dxel ad naban xlia'tzidi,
ad beenbee xlia' tëëtidi dux Dad ree Jesucrist. ⁹ Per
bén ad rüjnt naguiejn guiban zian, laaman naj zi'c
tijb bénlutia'p o zi'c tijb bén ad ruguiaat zift, ma
bayanladxaman guial biquied Dios xtolaman ni
beenman guia'xchej. ¹⁰ Zeel rnin lojdi, compniar
raliduladx ree Jesucrist, zi'c ma bacaabee Dios
lëjt ma gulej tëëman lëjt, gol been naguiejn gol
guzudxi'ch loj xnejzaman, din bal sudxi'chidi, ad
zayajbtridi loj dol. ¹¹ Zian gapidi nejz nali din
chu'di lod rniabee dux Dad ree Jesucrist tiblayaa,
bén babëë dunuj ree loj dol.

¹² Zeel zianczi ganin nine ree lojdi din gusaal-
adxidi laa reen, mäjsi ma ragbeedan, mäjsi
ma zinal tëëdi ni diidxli ni ma bacaagdiajguidi.

¹³ La'tgaj nabanan loj guidxliuj guie, naladxan
rayal gunen consejw lojdi con ree diidx guin.

¹⁴ Din por dux Dad ree Jesucrist ma gogbeen guial
ma zidyob dxej yazaan loj guidxliuj guie.

¹⁵ Zeel cayün da'tan naguiejn rnienë'n lëjt, din
gusaaladxidi da diidxan mäjsi ma güjtan.

Bén baguiaa ree xguialrniabee Jesucrist

¹⁶ Chi ranan lojdi xhienaag naj xguialrniabee
Jesucrist xhie tëë naag gui'taman stijb, ad
balëëguijctan ni banan lojdi. Din con quiqb du
lojn baguiaan xbianiman ¹⁷ chi biguien cha'
Dios diizd xanyabaa, gulesaman xvaloraman
baza't tëëman laaman zagdxe, rëbaman: "Xin guie
naj da xi'nan, rënan laax rabaanë' tëën laax."

¹⁸ Abi' dunujn nayajc bén biguien cha' Dios diizd xanyabaa chi nadxu'në'n Jesús ruguia' zii, lod biguien xbianiman.

¹⁹ Zianan zeel mazri raliduladxan ni rëb ree bén badëëd xtiidx Dios loj ree bejn, zeel zagdxe naj bal yu'guijquidi ni rëb reeman, din xtiidx reeman naj zi'c tijb guij rusni lod nacay la'tgaj rareguiaal. Yan ziangajc lëjt chaawladx cusnuu cayagbeedi xcwent Dios xt chi gui't Jesucrist stijb, bén naj bajl rusni par dunuj ree, dxel ma gagbeedi graczan zi'c tal najn. ²⁰ Per gol gogbee guial ni'qui tijb xtiidx Dios ad zajct chignia' bejn por xixgabzaman. ²¹ Din bén badëëd ree xtiidx Dios loj ree bejn, ad guneet reeman xtiidxaman zi'c goczi xixgab reeman, gunee reeman ni basajb xSprijt Dios guijc reeman.

2

Bén rulüü ree diidx rusquiee (Judas 4-13)

¹ Zian zi'c guyu ree bén rusquiee loj ree bén Israel tiamp gulal rëb reeman rudëëd reeman xtiidx Dios loj ree bejn, ziangajc chu' ree bén rusquiee gulüü lëjt ni rusquiee ree, yaguil reeman mod din gulüü reeman lëjt ni ad najt diidxli par gagdxadi. Ad zatiëbt reeman nabee Jesucrist laa reeman, majsi baguijxaman xtol reeman, zeel ad zaglaat gunijt Dios laa reeman. ² Per zien ree bejn chinal guiban nadxuudx zi'c naban reeman, abi' por laa reeman guinieeguijdx ree bejn xtiidxza'c Dios. ³ Abi' guial rzëëbladx reeman milia, yaguil reeman xhie ni rusquiee gulüü reeman lëjt din tia' reeman xmiliadi, per ziangajc ad zalaat reeman

Gui'ch barojp bacaa San Pedr 2:4 iv Gui'ch barojp bacaa San Pedr 2:12

loj xcasti Dios ni cabëz laa reeman, din diizd gocli mal yu' casti ni yayal ree bén rüjn zian.

⁴ Ad beent Dios perdon anjl ad bazoobt ree xtiidxaman, guxhaalaman laa reeman gabijl, abi' nada'cw reeman lod nacay da't, cabëz reeman dxej güün xguialguxtisaman. ⁵ Ad been téeetaman perdon benmal guyu ree tiamp gulal, banijtamán laa reeman con nijs. Tijbzi Noé bén balüü xhienaaag chinal ree bejn xnejz Dios, laazaman naj bén gulaa con zagajdx ree bejn. ⁶ Ziangajc chi been xguialguxtis Dios con ree guiedx Sodoma né Gomorra, baze'caman laa reen xt bayajc reen cobdëj, abi' laan naj ejempl par ree bén guiban nadxuudx zi'c ree bén guiedx zii ree. ⁷ Per baslaa Dios bén brii laj Lot, bén guban zi'c rën Dios guyu téeeman xgab guial baguiaaman zi'c guban ree benmal guin. ⁸ Abi' guial gubajnman zagdxe, zeel guixie guixie guyunaya da'taman por ree nidxuudx biguiejnman baguiaa téeeman been ree bén guin. ⁹ Rajc rüjn Dios yudar bén ruzoob ree xtiidxaman xhietëež loj prueb cadëd reeman, abi' ma naj xhie güünnëman benmal ree dxej güün xguialguxtisaman.

¹⁰ Laan naj ni yayal ree bén naban zi'ctzi rën reeman, ad rënt reeman nabee Jesucrist laa reeman, däd nad reeman, ad ratut reeman, ad rdxeb téeet reeman rniecegijdx reeman bén naj ree xianjl Dios. ¹¹ Abi' ni'qui ree xianjl Dios, majsí rajp reeman mazri gojł né guialrniabee, per achet diidxgijdx rëb reeman lojman contr laa reeman.

¹² Lasa' ree bén guin naban reeman zi'c ree be, ad yu't xquiarguiejn reeman abi' rniecegijdx reeman ni ad rignia't reeman, guidiblagaa rüjn

Gui'ch barojp bacaa San Pedr 2:13 v Gui'ch barojp bacaa San Pedr 2:19

reeman ni rëntzi reeman sin xgab. Zi'c ree be zëëdzi reeb loj guidxliuj guie par guiniaaz reeb din guiët reeb, ziangajc laa reeman por nidxuudx rüjn reeman ma cuseëb laagajc reeman, ¹³ abi' yaguijx reeman gra ni rüjnnë reeman bejn ree.

Rabaa da't reeman guial rüjn reeman ni dxuudx ree, ni natu ree.

Naj reeman zi'c tijb manch, ruxhiin reeman lanij rüjndi chi rawidi tijbz, abi' rabaa da't reeman guial rusquiee reeman läjt.

¹⁴ Ad zajct guguaa reeman tijb bengunaa sin guial ad züjnt reeman xgabdxuudx, ad rucwëëzt rüjn reeman dol rusquiee tëë reeman bén ad rignia'za'ct ree xtiidx Dios din güün reeman dol, abi' däd nasin reeman par güün reeman gan ni rzëëbladx reeman, laa reeman ma naj par yayal reeman xcasti Dios. ¹⁵ Ad zinaltri reeman xnejzaman, ma bidxaa zi'c naban reeman, ma zinal reeman ni been Balaam bén badëëd xtiidx Dios loj ree bejn, xi'n bén brii laj Beor, chi guyënman nünjanman gan milia por ni mal nünjanman. ¹⁶ Per chi zëman ziguileenman ni mal guin, bacwëëz Dios laaman, basneeman xburaman zi'c tijb bejn, zian bacwëëz Dios xixgabtontaman.

¹⁷ Yan bén rusquiee cuzat reen lojdi naj reeman zi'c bizë ni ad yu't nijs, zi'c zaj ni ad nët guia, zeel rayal reeman lod nacay da't lod ad yu' tëët dxej yarii reeman. ¹⁸ Ganax ree diidx nabë rü reeman, diidx ad rüjnt ree sirv, rëb reeman guial achet güünan guiban bejn zi'ctzi rënman, abi' zian rusquiee reeman bén qui cusa'nri ree nejzmal. ¹⁹ Rëb reeman guial achut rayal nabee bejn, per ad rignia't reeman guial nidxuudx rüjn reeman

rniabee laa reeman, din graczi ni ad rajct rucwëëz rüjn ree bejn, laan naj ni rniabee laa reeman. ²⁰ Chi ma beenbee ree bejn dux Dad ree Jesucrist guial laaman naj bén babëë dunuj ree loj dol ma basa'n tëë reeman nidxuudx yu' ree loj guidxliuj guie, abi' rtiëjb reeman rniabeen laa reeman stijb, dxel piorli guiban reeman guial chi gad reeman güünbee laaman. ²¹ Zagdxeli naj ad nüjnbeet reeman xnejzaman, guial beenbee reeman laan abi' basa'n reeman xtiidxza'caman ni ma biguiejn reeman. ²² Con laa reeman rajc cumplid diidx ni rëb: "Rayaw bë'cw ni bayëbib, guíaad cüch qui gojzri con nijs naya rayub loj nizbajn."

3

Ni gac chi gui't Jesucrist stijb

¹ Gradi compniar raliduladx ree Jesucrist, rën da'tan läjt, nine naj gui'ch rarojp rxhialan par läjt. Loj grop gui'ch guie cayünan naguiejn ganenë'n läjt din güundi xgab zi'c rayal. ² Gol basaaladx ni rëb ree bén badëed xtiidx Dios loj ree bejn tiamp gulal, gol basaaladx tëë xtiidx dux Dad ree Jesucrist, bén babëë dunuj ree loj dol, xtiidxaman ni balüü ree apóstoles läjt.

³ Gol badxe'guijc, chi ma zidyob nit guidxliuj, chu' ree bén guze' läjt abi' guiban reeman zi'ctzi rën reeman. ⁴ Abi' na reeman lojdi: "¿Gon promejs been Jesucrist guial gui'taman stijb? Ma güjt gra ree dux bengulal ree, abi' graczi ni yu' loj guidxliuj guie sta naj gajc diizd chi gocchaaw guidxliuj." ⁵ Na reeman zian, guial ad rënt reeman yayagbee reeman guial diizd tiamp gulal mal yu'

Gui'ch barojp bacaa San Pedr 3:6 vii Gui'ch barojp bacaa San Pedr 3:15

xanyabaa në guidxliuj abi' por xguialrniabee Dios brii guidxliuj guin loj nijs. ⁶ Gojc xchej, dxel con nijs gajc banijt Dios bén gocli ree. ⁷ Per xanyabaa në guidxliuj raguiaa ree yan, ma naj guial gunijt Dios laa reen con bajl por xguialrniabeeman dxej ni güün xguialguxtisaman con ree bén ad ruzoobt xtiidxaman.

⁸ Zeel rnin lojdi, compniar raliduladx ree Jesucrist, ad bal yayanladxidi, guial par dux Dad ree Dios tib dxej naj zi'c timil ijj, guiáad timil ijj naj zi'c tib dxej.

⁹ Ad cayaglaataman par güün cumplid xpromejsaman, zi'c naladx garol ree bejn, rajpaman pasens, din ad rëntaman guial nit bejn delant lojman, rënman guial gra bejn yayagbee laaman.

¹⁰ Zi'c tal ri't tijb bengubaan achut ragbee gui'taman, zian guidxin dxej gui't dux Dad ree Jesucrist stijb, nadxeb da't gac naquie' chi nidloj xanyabaa, guiáad gra ree ni yu' xanyabaa guin, gunijt Dios laa reen con bajl, në guidxliuj con gra ree ni yu' lojn, con bajl gunijt Dios laa reen.

¹¹ Yan, guial ma ragbeedi xhiennaag nit guidxliuj, rüjn naguiejn guibandi naya sin dol zi'c rën Dios.

¹² Con gan gol gulëjz dxej ni ma gulejman, dxej ni guze'caman xanyabaa në gra ni yu' xanyabaa, zi'cgajc guidxliuj con gra ni yu' lojn, con bajl gajc nit reen dxej zii. ¹³ Per dunuj ree caylëjz ree xanyabaa cüb në guidxliuj cüb zi'c ma been Dios promejs, ni gac zi'c tal rënman.

¹⁴ Zeel rnin lojdi compniar raliduladx ree Jesucrist, la'tgaj cabëzidi gac ree ni guin, gol been da't naguiejn din guidxaagloj Dios lëjt naya sin dol, riga'dxenë tëë lasa'di. ¹⁵ Gol badxe'guijc, guial dux

Gui'ch barojp bacaa San Pedr 3:16 viii Gui'ch barojp bacaa San Pedr 3:18

Dad ree Dios cayajpaman dunuj ree pasens, din yaya'p ree tiamp yasa'n dux tol ree din yaye'c ree lojman. Abi' dux compniar ree Pab, bén rayën da't ree, ziangajc naman lojdi loj ree xtiidxaman, zi'ctzi naj quiargueijn ni bazaladx Dios lojman.

¹⁶ Gra loj ree xtiidxaman naman lojdi ni canin lojdi. Per yu' lajt loj ree gui'ch guin lod naj nawëeg guial chignia' bejn, dxel bén ad rajctczi ree né ree bén ad zinalt xtiidx Dios con guidib luxdoo, ruchaa reeman ni rën/guiëb xtiidx Pab, zi'cgajc rüjnnë reeman ni zëéd ree loj xtiidx Dios, zeel laagajc reeman cuseëb laa reeman.

¹⁷ Compiiar raliduladx ree Jesucrist, rënan lëjt, zeel yan guial ma ragbeedi nine ree, gol gojp ciudad chitëë güün ree bén rën ree gusquiee lëjt gan, chitëë gucwëëz sudxi'chidi loj xnejz Dios.

¹⁸ Zagdxeli gol been naguiejn güünbeedi mazri dux Dad ree Jesucrist, bén baguijx dux tol ree, gol been tëë naguiejn gagbeedi mazri guial rën da'taman dunuj ree. Laaman rayal respejt gra tiampczi.

Xtiidx Dios

New Testament in Zapotec, Santo Domingo Albarradas (MX:zas:Zapotec, Santo Domingo Albarradas)

copyright © 2010 Wycliffe Bible Translators, Inc.

Language: Zapotec, Santo Domingo Albarradas

Translation by: Wycliffe Bible Translators, Inc.

Copyright Information

© 2010, Wycliffe Bible Translators, Inc. All rights reserved.

This translation text is made available to you under the terms of the Creative Commons License: Attribution-Noncommercial-No Derivative Works. (<http://creativecommons.org/licenses/by-nc-nd/3.0/>) In addition, you have permission to port the text to different file formats, as long as you do not change any of the text or punctuation of the Bible.

You may share, copy, distribute, transmit, and extract portions or quotations from this work, provided that you include the above copyright information:

You must give Attribution to the work.

You do not sell this work for a profit.

You do not make any derivative works that change any of the actual words or punctuation of the Scriptures.

Permissions beyond the scope of this license may be available if you contact us with your request.

The New Testament

in Zapotec, Santo Domingo Albarradas

© 2010, Wycliffe Bible Translators, Inc. All rights reserved.

This translation is made available to you under the terms of the Creative Commons Attribution-Noncommercial-No Derivatives license 4.0.

You may share and redistribute this Bible translation or extracts from it in any format, provided that:

You include the above copyright and source information.

You do not sell this work for a profit.

You do not change any of the words or punctuation of the Scriptures.

Pictures included with Scriptures and other documents on this site are licensed just for use with those Scriptures and documents. For other uses, please contact the respective copyright owners.

x

2014-04-30

PDF generated using Haiola and XeLaTeX on 11 Nov 2022 from source files
dated 29 Jan 2022

fb4ebcb8-e1f4-5bfc-b08c-f590e137d86d